

永平府志卷之十五

萊陽宋 琬撰次 府學訓導徐 香叅訂

蕭山張朝琮續纂 盧龍教諭胡仁濟校輯

宦績

古先王建官惟賢位事惟能苟食祿而無愧自垂令
名於無窮永郡自漢晉以迄於明代不乏人建奇奏
績光耀簡端我

朝定鼎以來克勸盛治而佐昇平者復接踵而見炳炳蔚
蔚可謂後先輝映矣是知時無今古不朽者傳官無

永平府志

卷之十五

一

崇卑無忝者尙後之銜命而至牛覽前蹟而思效焉
庶不負於宦矣

漢

李廣隴西成紀人秦將李信之後猿臂善射訥口少言
才氣天下無雙景帝授爲隴西都尉復徙爲上谷代
郡雲中太守皆以力戰知名景帝崩武帝立遼西太
守軍敗詔拜廣爲右北平太守匈奴畏之號曰飛將
軍數歲不敢入右北平嘗出獵暮歸見草中石以爲
虎而射之中石沒鏃視之石也復更射之不能入廣

母及妻子道經柳城值鮮卑寇鈔爲所劫質載以擊郡苞率衆與賊對陣賊出母以示苞悲號謂母曰爲子無狀不圖爲母禍母遙謂曰人各有命何得相顧以虧忠義苞卽時進戰賊悉摧破母妻皆被害詔封苞爲侯苞曰食祿而避難非忠也殺母以全義非孝也何面目立於天地遂嘔血而死

晉

慕容廆鮮卑人幼而魁岸雄傑大度元帝時爲安北將軍平州刺史政事修明愛重人物故士庶多歸之後

永平府志

卷之十五

三

督都幽平二州諸軍事封遼東公

慕容皝廆子英武有父風成帝時督都平州先是石勒遣宇文乞得龜擊皝迎攻之悉得其衆乘勝拔城收其資用徙其人數萬以歸又敗石虎軍於沒城遣使獻捷於晉穆帝永和四年卒

後魏

常英初授肥如令廉善仁明不事嚴苛治民多惠政繼遷平州刺史以地薄邊塞重農務修武備使民家有餘蓄鄉勇皆爲健卒後封遼西公卒謚遼西平王

張偉字仲業太原人大武神童四年與咸陽公高允等
三十四人並徵偉拜衛大將軍選營州刺史有善政
卒贈建安公

陸士懋字元偉代郡人天平中以其祖陸麗有翼戴之
勲詔懋襲祖爵鉅鹿公仕營州刺史

于天恩代郡人熙平中任遼西太守賦性中和百姓懷
之贈東平將軍燕州刺史

張卓上谷沮陽人初爲昌黎太守父翼爲遼東太守子
袞爲幽州刺史三世二千石俱有善政人稱美之

永平府志

卷之十五

四

唐

張仲武德宗朝爲盧龍節度使鎮邊有功李德裕幽州
聖德碑具載其事

張儉貞觀時爲營州都督太宗征遼東拜行軍總管領
諸蕃騎爲六軍先鋒

田仁會張安人爲平州刺史時旱自暴以祈雨雨通禾
熟民歌曰父母育我兮田使君挺精誠兮上天聞中
田致雨兮山出雲倉廩實兮禮義申君常在今兮不患
貧後遷右金吾子歸道孫賔延三世並爲金吾將軍

祀名宦

鄒保英萬歲通天初爲平州刺史契丹入寇城且陷妻
奚氏率家僮女丁乘城不下詔封誠節夫人
張仲素懿宗朝爲平州刺史有威望州人服之

遼

韓德樞爲遼興軍節度使釐紛剔蠹恩昭信孚勸農桑
興教化民獲蘇息後遷平灤營三州觀察使

室昉會同初登進士第爲盧龍巡捕官累遷翰林學士
兼政事舍人數延問古今治亂奏對稱旨改南京留

永平府志

卷之十五

五

守決訟平允人皆便之遷工部尚書尋改樞密院副
使參知政事頃拜樞密使兼北府宰相同政事門下
平章事監修國史進尚書無逸篇以諫太后聞而嘉
獎立朝輔政整折蠹弊知無不言務在息民薄賦以
故法度修明朝無異議晉鄭國公進所撰實錄二十
卷手詔褒之上以昉年老苦寒賜貂皮衾褥許乘輦
入朝病劇遣使就第存問及卒贈尚書令

元

劉德溫永平路總管當大曆兵革之餘野無居民溫爲

政期年而戶口增倉廩實學校興庶事畢舉歲旱竭誠禱祀霽霖大至其年大稔

孫明大寧人英銳不拘小節好學能詩以明經任山北憲司幕至政四年遷灤州知州刑清政舉修學養士州人賴焉

郭仁義武州人大德中任遷安尹惠愛及民秩滿當代縣人保留不得立石頌之祀名宦

左濶良鄉人泰定中任昌黎尹尊崇學校輕徭薄賦愼用民力老稚咸感思之勒石紀德

柴本立至元中任樂亭尹敬事勤民無一夕懈覩廟學頽圯慨然嘆曰學校不修儒風靡振長民罪也於是捐俸金集同志撤而修之成不逾時民亦不告勞當時翕然稱焉

道宦蹟

古者有文事卽有武備秦漢以來設官分職將相兼資如太守文秩也而漢則拜將軍爲之兵備武勲也明人又以道臣監之其後又推此義或以餉司加銜兵部或以協鎮兼理地方顧事權相軋開嫌構隙遇有緊急互相推諉以致貽悞不可救藥

今制文武各分文司民牧以整飭地方武治軍旅以詰戎弭盜無相牽制各守職司何其善歟永平舊無兵備向係薊州道兼攝嘉靖中時值多事自薊至永延袤

永平府志

卷之十五

七

三百餘里地稱衝要永屬重鎮一遇有警猝難救援朝議專設監軍使者備兵永平稱爲東協薊鎮稱爲中協

國朝康熙四年改兵備爲整飭不司戎務八年四月內奉文移駐通州改爲通永道以統轄焉

永平道

明

嘉靖

溫景葵字汝陽號三山山西太原人三十九年任自霸

州移任創制籌畫精密周詳蒞任四年練兵裕餉事
愜人心立糴貯法以厚農立入倉法以甦商稽運法
以清胃支設徑解惜薪司法以全活衛職修諸營寨
城堡新郡城樓七座約束軍衛寬嚴相濟居民賴以
安枕又遴八庠之士館之孤竹書院聘師豐廩嚴課
鼓舞癸亥之變總兵陣歿督撫重譴朝議以公夙望
特授都御史巡撫順天

隆慶

楊兆字夢鏡號晴川陝西膚施人三年任爲政平和近

永平府志

卷之十五

八

人撫恤瘡痍作興學校凡坊表署額皆出其筆陞都
御史巡撫順天

孫應元號華山湖廣鍾祥人由進士四年任時坐商糴
餉罄資賠補猶擬遠戍公力白當道宥誣坐土商戍
邊者四十餘家永人世尸祝之調恤貧士加意學校
至巡視邊檄不憚險阻皆公自檢覈力除虛冒軍衛
斂手牙儉裹足其剛介精敏如此萬曆五年陞山西

巡撫

萬曆

葉夢熊字男兆號龍塘廣東歸善人由進士十三年任
政尚寬平豁達而持大體時守臺南兵欲爲亂公設
法撫定之聘舊門下生郭造卿修府志以備一方文
獻陞山東按察司

楊鎬號滄宇河南商丘人由進士二十年任才猷揮霍
風采瀝然舊例石門產煤縣輦送道府各署以供官
用里民輓運絡繹苦累不支公至力禁之熟諳邊務
下筆數千言立就按之皆中肯要遷遼東叅議尋陞
經略尚書都御史

永平府志

卷之十五

九

劉澤深字警圖河南扶溝人由進士四十六年任治政
剛決不容奸僞人莫敢于以私其所興除皆大利大
害陞湖廣叅議入名宦

天啓

張春號太宇陝西同州人由舉人時值多事朝議以公
有經濟才由刑部主事特命備兵永平一時治政琤
琤有聲尋轉山石道以執法不阿移病歸崇禎二年
復起爲永平兵備收復永灤嚴禁屠掠全活難民甚
衆論功加太僕寺少卿仍請告回籍再起備兵通州

不數月又調永平

皇清兵下大凌河公率兵救援兵衄被執堅求自盡

太宗文皇帝嘉其忠直優養十年公留髮不薙及卒以禮

葬之康熙三年公子伸乞骸歸葬

特旨准從所請路經山永人皆祖道焚鑼繹絡不絕輓詩

弔賦投滿行笥先是永人聞公死難建立專祠凡四

區一在東郭門外百步許一在北郭外湯坨莊一在

縣治東關帝廟一在灤州其德澤深入人心如此當

公敗績時夫人盡節於永平韓氏樓中公每食必具

永平府志

卷之十五

十

筯遙遜同滄父忠子孝夫義婦烈皆出性成人名宦

仍從祀武廟表忠祠

崇禎

鄭國昌號天符陝西邠州人由進士元年任時邊圉多

事羽檄交馳公應之裕如二年冬

皇清兵下永平四境綦嚴時議士著防兵單弱調陽武營

卒協守歲除主客爭酒食豐嗇治兵相攻因縱火衆

大譁永城遂破公策馬親冒矢石力揮武營兵數人

復率內丁堵馬道攻射武營逃兵事已無濟有勸出

亡者公厲叱之回署公服西向再拜曰臣力竭臣罪不可贖矣乃約夫人子女闔門縊死公從容自盡命舉火以焚事平追贈太僕寺卿立坊表之仍從祀武廟表忠祠

劉景曜號嵩曙河南登封人由進士六年任賦性正直不輕言笑時中官奉使閱兵有總監總督監視欽授等名橫甚稍弗遂意輒奏行逮治公獨不往謁疏揭凡七上時稱敢言察邊閱操例兵備伺陪以屬禮見公乘肩輿直至演武中堂總監出幄迎以賓禮會公

猶抗言不稍假以顏色永鎮各邊將士得免橫索凌鑠皆公力也督師孫公傳庭奉命赴山海監視倚上方劍縱護衛兵不守紀律聲勢赫然所過地方民爭趨避公館之郭外不令一騎入城行糧自俾上運給之孫公怒提協將知縣鄉總欲置以法公不爲禮事旋解城中得免糜爛永人德之陞山東巡撫所著有嵩山文集及北平名景諸書

丘民 號石門陝西渭南人由舉人十二年任公有文武才歷貴州道御史凡條議時事皆中肯要有聲於

臺旋督薊遼兵餉輓運有方中外倚重以永平巖疆
簡公備兵甫下車嚴飭邊防稽覈士馬頒固圉錄以
備城守著帥中錄以教戰攻習火攻諸法以資行陣
講馬政錄以備征調所部將士樂其馳驅熟其訓練
一時甲冑旌旄嚴翼生色尋調爲遼東寧前提學道
朱國梓字鄧林前屯衛人總鎮朱梅子由選貢十六年
任操持耿介治政剛方慎重精明屏除陋習甲申春
逆闖陷京將薄永郡公赴關與總鎮舉義拒寇值

國朝大兵掃蕩寇氛公卽奉母石門高隱以終先任關門

永平府志

卷之十五

十二

主事簡靜不苛建且止亭於關外以爲候關內舍至
今稱便

國朝

順治

李丕著號愚公山西曲沃人由進士元年任當鼎革初
郡邑無專官公措置經理城市始知有法乘亂爲盜
者許其投首自新招撫流離民得復業又請設寓學
綏恤遠士立月課以示鼓舞凡有不便於地方者不
待陳控卽革除之陞淮海道士民感其鎮定安輯功

肖像立祠於南山之巔

宋琬字玉叔山東萊陽人由進士十四年任公慷慨明決遇事立剖一時奸宄斂跡境內肅然府學兩廡傾圮設法重修添設左右角門及增修東西便門與名宦鄉賢兩祠開櫺星門雲路其規模壯麗皆前所未有又按八佾設樂舞生捐修樂器以光祀典搜輯府志二十三卷以備百年文獻所著有安雅堂文集秦州記異諸書陞浙江分守寧紹台道尋進浙江廉使

康熙

永平府志

卷之十五

十三

錢世清字生一浙江錢塘人由選貢四年任公甫筮仕卽簪筆直廬周知制度典章沿革要務所在居官忠寬敏惠廉靜端凝歷有聲譽其僉臬北平也咨郵民隱崇尚省約蒞任數年間凡屯田駟牧郵傳諸大政以迨城郭學校倉廩隄圩罔不具飭一時屬吏咸承風化焉郡丞梁某賠補官糧貧不能償以鐫級解任尋歿於官公矜恤之代措千五百餘金得歸其喪公生平盛德類如此周恤貧士鼓舞庠司孳孳不倦凡祠廟載在祀典有關風化者亟修葺之尋移駐通州

道銜加通永自公始辛亥歲

予告養親去之日士民攀轅涕泣如失怙恃議入名宦祠
崇祀

崔誼之號老山山東平度州人由進士十年任公初筮
中州令多惠政行取民部秩滿僉臬通永寬厚宅衷
虛公執法念各屬衝繁不輕差役以滋煩擾餽送悉
屏絕之時以廉靜聞

白爲璣字子儀鑲白旗人由監生至性孝友裕經濟才
初筮東光令賢績懋著巡撫李公以大城西堤緊要

永平府志

卷之十五

十四

題授河間府丞保飭河防克見成效遷本郡守四
十五年遷通永道副使自初仕迄今總皆

特旨超擢公周恤民瘼凡遇地方水旱蝗蝻沐雨披星不
憚寒暑竭力經理故數年來畿東無灾祲之告實
公之力也立品端方望之如泰山北斗而存心仁恕
曲體下情公事調委屬員溫詞慰勞徃徃捐俸資給
下皆感德而忘其勞一切政務振綱肅法告誡諄誠
所屬吏治民生咸向化蒙休云

明

崇禎

楊嗣昌號文 湖廣武陵 三年任秉憲山石

將佐凜如神君癸酉晉山海 南北兩翼城以

固疆域刊鄉約化民書令有司師生朔望講讀以正

風俗因魁路逼狹 學宮乾地捐俸建明倫堂三楹

及儀門大門廓然大觀經始甫竣以遷秩去至今山

海士子猶頌德弗諼

永平府志

卷之十五

十五

范志完河南虞城人由進士十二年任公多材藝優幹

辦任事三年百廢具舉峻城濬池寬徭飭驛鼓舞行

伍作興學校崇秩祀獎節孝救荒恤困一時政治爲

之改觀陞山西巡撫擢總督時不可爲未得以功名

終士論惜之

永平戶部分司宦蹟

明永平設有監軍號曰東協爲畿東重鎮因兵設餉
士馬芻粟俱取給於薊州往返千里士卒苦之嘉靖
四十二年用巡按董公堯封議令設戶部分司於永
平以專理之提調各省額派銀兩便於呼應

國朝順治九年移駐薊州後裁

明

嘉靖

程鳴伊字希正號消溟山東安丘人由進士四十四年

永平府志

卷之十五

十六

任勗立永豐倉廩修建衙署助糧以修學宮捐俸以
恤寒士爲分司題名碑記大意俱繼先任郎中呂公
霍經畫舊制可稱蕭規曹隨董薈張發也陞山西大
同知府晉太僕寺卿

隆慶

許守謙字子受號益齋直隸藁城人由進士四年任嘉
靖時充商者悉蕩產賠糴後誣坐侵欺充戍四十餘
人公力爲辯豁人皆戴之歷兵部

宋豸字思直號直菴直隸容城人由進士五年任時議

蠲商未決公知應者苦逐一蠲之陞汝寧知府至運使

萬曆

馬瀚如字紆之號抱白河南陳留人由進士十三年任時郡歲租甚尠議僉商糴買以實倉庾永人駭愕咸鬻產爲逃避計公如廣開中法令鹽商輸粟各倉不用土著而僉商之議寢矣人皆德之

陳名華字誠甫號章閣福建晉江人由進士九年任文望素著申明不用土商之令客兵屯海上擾民請撤

永平府志

卷之十五

十七

之士民立石以頌二十三年調禮部主客司郎中

李開芳字伯東號還素福建永春人由進士二十年任博學通才出納明允善屬文精隸篆公署祠宇表額多出其手

黎芳字蘭谷四川丹稜人由進士寬厚博大軍民並戴東征煩費支應有方重修永豐倉以儲兵餉陞陝西兵備副使

宋繼登字先之號子亭山東萊陽人由進士四十六年任修理倉廩設立銀庫以專責成收授稱平力豁僉

派軍民戴之泰昌元年陞淮津海運兵備道

天啓

方岳貢字四長號禹修湖廣穀城人由進士六年任仁
慈廉介凡倉庫錢穀出納絲毫不取餘羨有逋戶解
比者不事敲朴惟勸令速輸而已放餉刻期不爽嚴
杜借扣諸生有以文藝謁者給膏火課勵之接物和
平樂易咸以長者稱陞松江知府遷督糧道時有以
受賄誤訐者廷質廉其實加陞都御史尋入內閣未
幾乞骸歸囊篋蕭然授徒自給門生故吏道經穀城
脩謁衣文綺者拒斥之其廉介如此

永平府志

卷之十五

十八

國朝

順治

白芬字猗若河南洛陽人由舉人八年任剛果有爲御
下明決嘗自謂云興一利不若除一害甫下車嚴飭
倉庫示各役出入勿濫稍有弄法者悉痛治之積弊
頓清放餉按月支給無預支無過期出入權衡皆出
自較軍民愜服所著有四書幹程墨然諸書以教諸
生九年移駐薊州而永平餉司自此裁矣

山海兵部分司宦蹟

明

天順

楊琚江西泰和人由進士五年任公明練達舉措悉中
典型關法自譏察外無少留滯人咸稱便時衛學始
建拘行伍子弟克諸生皆以爲厲已弗樂公雅意作
人士習用變如鄭侍御親蒙講授卒成大器至今士
民稱頌不置

弘治

永平府志

卷之十五

十九

張愷字元之江南無錫人由進士二年任操持嚴介有
冰蘖聲關舊法止驗籍與年公始稽貌以杜詐僞之
弊至今因之其待士惠民外內一致雖黠詐者亦不
忍欺云

黃繡號文卿江南靖江人由進士五年任宅心平恕政
尙宜民時關內薪水頗遠居民仰給關外公給木牌
懸之出入樵汲甚便公絕有目力一經覩記終莫能
眩遇而生冒頂者輒指摘之卒無敢欺啓閉有常期
雖祈寒暑雨及他務叢集亦弗爽代去之日男女夾

道遮留車馬至不得行後轉巡遼東再經其地居民
猶依依不忍舍去

陳欽字亮之浙江會稽人由進士八年任清簡平易卓
有高致終仕無苛擾之令民甚德之且邃於詩學雅
好吟咏父教諭君遠從祿養常侍遊佳山水以娛其
志天倫至樂莫不觀感歆慕云

正德

黃景夔四川郫都人由進士十六年任舊衛守抗與部
使敵體公至呈部革之始廷叅如下僚儀地方薦饑

永平府志

卷之十五

二十

舉賑貸興義倉民賴存活者甚衆禁浮屠巫祝淫祀
及燔屍諸惡俗應如桴鼓無敢撓者衛學舊無廩餼
公墾田租給之暇則親爲校課士風彬彬興起焉

嘉靖

王冕字服周河南洛陽人由進士三年任初筮萬安令
值逆濠之變公召募勇敢繼撫帥進及逆兵剽安慶
趨還南昌爲釜魚計公率所部遏而擒之遷兵部主
事來守關甫五旬值妖卒變作群醜嘯呼露刃堦下
侍吏拽公潛避公正色拒賊以刃脅公從不屈死之

撫臣上其事贈光祿寺少卿

葛守禮山東德平人由進士十二年任公平生敦禮法
謹言笑褻躬範物一準古道至取與尤嚴一介關法
肅然時典章草昧自公始行鄉飲風勵耆德創立養
濟院著爲令惇獨賴之

陳綰浙江上虞人由進士三十五年任才氣倜儻熟諳
邊務下筆數千言立就按之皆中利害切時艱如守
邊賑荒諸論薊遼大吏俱屈服時關東西大饑公疏
通關政煮粥舖之民賴全活者甚衆

永平府志

卷之十五

二十一

商誥山東平原人由進士四十一年任壬戌歲邊敵數
千薄關東鄉民奔避如蟻議者請亟閉關公曰是棄
萬人命矣大開門納之少頃敵攻旱門關甚急公親
巡梁指揮方略勵將士拒堵敵竟遁去當時苟無公
民墜塗炭不可問矣事聞被賚加秩尋遷薊州兵備

萬曆

孟秋山東茌平人由進士七年任研精理學特立獨行
蔬布自甘不殊寒士平生義利之辨尤嚴諸生有志
問業者樂于啓發竟日不倦每念邊備日弛少有罰

緩盡捐以置神鎗火器爲戰守具或迂之答曰此夏官職也時江陵擅政邊帥競以賄進遼左尤狼籍公當關嚴檢閱因以京察被謫後起累官尙寶司少卿王邦俊陝西鄜州人由進士十年任廉靜端嚴寡言笑惟課訓則談吐不厭時江陵擅政前部使嚴謹關法十餘日始以啓關民出入頗不便公慨復舊法關內外歡若更生請建東羅城修理樓堞至今攸賴

張時顯江西南城人由進士二十三年任長於治才精覈整肅重修關志俱親筆主裁學識瞻雅時征倭總

兵陳璘幕下鼓譟賴公撫定一字獲寧

來儼然陝西三原人由進士二十九年任端重嚴整時稅璫高淮煽虐厚幣餽遺公盡卻之出入不與偕至有害於民力爲解釋淮亦畏其清鯁不敢縱惡任未久卒於官士民痛之西羅城外龍王廟後建有專祠邵可立陝西商州人由進士三十六年任公廉直剛斷道學入闈奧加意人文建文昌書院購古今遺書克之俊彥鼓篋其中面授指南登鄉會榜者彬彬值歲饑公令屯官清絕產置牛具分給婚不舉者衛有布

花之施貧不葬者普濟會有棺木之給賞三劾貂璫
四減關稅修鎮東樓工師苦無大木忽海上浮若干
至及落成無贏餘者亢陽不雨公三禱三應忠清正
直格於神祇時咸嘆異之

天啓

陳祖苞浙江海鹽人由進士五年任公一日坐堂上忽
有贏自關外闖入向堂長鳴公命人尾之至一家直
入掘地得屍廉其圖財致命狀抵罪又四人失路引
回關中官欲以奸細論公持不可得放歸以此致忤

永平府志

卷之十五

二十二

罷去東門甕城關帝廟左建專祠肖像後復起歷順

天巡撫

知府宦蹟

明

永樂

馬負圖山西臨汾人十年任牧御有方修舉廢墜百姓戴之如父母陞山西布政

正統

李文定浙江臨海人由進士五年任遇事立辨剛果有為修建郡學殿堂齋舍及鳴遠樓皆極壯麗陞福建布政使

永平府志

卷之十五

二十四

成化

王璽陝西盤屋人由進士四年任潔已愛人嘗闢郡學基墟奏復夷齊廟請賜額及祀典祭文時論偉之入祀名宦

弘治

吳傑江南江都人由進士七年任首崇祀典繕治壇壝修葺聖宮灤漆二河船夫歲用千餘人百姓苦之公悉力裁減如制郡舊有志永樂初年失之公下車首訪得一編殘缺舛訛乃屬致仕行人張公廷綱教官

吳公祺率諸生修之培植學校時稱師帥之冠

正德

何詔浙江山陰人由進士二年任時中貴王宏鎮邊踞視郡邑長吏公獨不徃其所誣盜成獄者十有四人竟出不坐郡有叔殺人而賂見知者移罪於姪獄成且二年公一訊立辯釐宿弊均糧役修學校勤考課聞母艱去百姓皆追送泣別立去思碑入祀名宦歷官工部尚書

嘉靖

永平府志

卷之十五

二十五

張珙山西石州人由進士二十五年任下車卽釐剔宿弊凡有不便於民者悉力除之置脂膏簿頒示屬吏無敢擾民立孤竹書院以風勵士類集文行優者肄業於中拓夷齊故城修舉如制祠成編志畀守祠者世守之陞酒泉兵備尋轉薊門巡撫入祀名宦

廖逢節河南固始人由進士四十三年任設立木鐸自府治達閭巷晨昏以六諭號詔之有崇古化民之意時左道盛行結衆釀亂公罪其倡首者衆始解散其自奉衣不羅綺食不兼味設義倉編保甲立鄉約勤

蒙養息訟緩徵與民休息蒞任三年芝產後庭四十年陞山西副使

萬曆

顧褒浙江餘姚人由進士二年任歷事精明劃如風雨公文不假胥吏援筆數千言立就聽斷獄訟一見卽決庭無留繫盡革贖鍰等弊時各衙門僱差驛遞僱役爲時大累公嚴禁止之一時吏治肅然

任鎧山西平定州人由舉人六年任時料丈田地公以小民無知十止報九當罪者衆乃新製步弓比舊暗

永平府志

卷之十五

二十六

增五寸俾執以度則地視前丈分數相合衆俱免辜存心寬厚御下不尙鞭笞時論稱爲仁厚長者建南門樓憑虛閣陞寧夏副使

陳維城山東丘縣人由進士十五年任操守廉清衣履若寒士衛餘僉大戶徵收立致罄產公決議以收納事盡責各衛首領著爲令甲舍餘得甦又嘗留心郡乘與郡司李沈之唸聘閩名士郭造卿重修百年曠典陞山西赤城道副使

徐準山東新城人由進士二十四年任才幹精明臨事

爽決時倭警方熾海防單弱公請兵二千防海一時
恃以無恐倭平仍申文撤之又奉調征倭兵十萬由
永渡遼供需飛輓增派地丁銀若干倭平悉飛告減
復如舊六屬歡呼至條議河工利害曲折詳盡遇事
敢爲屹然莫奪朝議以公長才加河南按察司副使
二十七年陞遼東海蓋道山西叅政

高邦佐號衷白山西襄陵人由進士初履任卽謝絕墳
宅供應所需日用薪米悉與平值文移朝進暮發無
停擱者輸納盡去羸羨官衙如水胥僮如繼聞有書

永平府志

卷之十五

二十七

手朋匿糧地稽得其狀入籍賄財飛詭毫無所容兩
巨商重辟鬪牽問者久不決一經平反人心皆服權
稅六屬分認歲額爲累改以公用抵補折稅璫高淮
誣搶驛卒及土元毒噬良善公皆全力挽救之朝覲
不用郵遞夫馬禁加派甦凋敝惠政纍纍永人立石
頌德陞天津道副使

天啓

陳所立字如有福建長樂人由舉人二年任性嗜經術
甫下車卽於府治後建立書院以清聖主於中政暇

集諸生講論文義終日不倦諸生皆感發執經其文
行俱優者格外禮遇之每歲暮各給膏火炭資以勵
其學諸生益奮北郭外淝漆二水潑滙夏秋漲輒嚙
城趾公設法自拱辰門至菊花臺橫築磚隄里許障
之今遺趾尚在著有北平詩賦諸集書院題名石板
名景鐫石猶存

崇禎

張鳳奇山西陽曲人由舉人元年任蒞任初卽值羽檄
交馳軍需旁午公修補廢壘設備芻糧爲固圉計二

永平府志

卷之十五

二十八

年己巳冬永平戒嚴公悉心捐募鼓勵軍士又出庫
銀以餉鄉勇三年庚午永城不守公盡出所有散諸
行市及輿隸命自盡後代爲焚之乃咽藥而死夫人
闔門雉經事平贈光祿寺卿從祀名宦并武廟表忠
祠

彭份字洗存江西南昌人由舉人十三年任下車約法
三章懸鑼中門有冤抑者任其不時申訴築敵臺以
固東園修泊岸以障西河前官遺逋累公鐫級者六
矣終不遣一騎以督各屬歲稔蝗不入境永人有秋

盡數年逋欠爭相效輸得盡復所鑄級修葺府縣學
宮設處二千餘金並未擾及民間庚辰大饑流民萬
計趨永僵仆載道公措施衣粥爲暖舍以居之所全
活甚衆車騎營兵乘夜鼓譟公戒守柵扼巷始開門
擊之譟兵以無內應宵遁城中得免屠掠時服其才
大而識高云陞貴州道副使

國朝

順治

馮如京山西太原振武衛人由恩貢元年任值開國初

永平府志

卷之十五

二十九

以本府同知擢用彈壓變亂招集流離申請創立寓
學以恤遠士革除明季陋規以撫瘡痍六屬欽服士
民愛戴尋陞榆林道副使歷廣東江南左右布政
李日芄字培原滿州人由生員二年任懲投克革濫派
吏不能爲奸尋陞霸州道副使歷官操江都御史卒
於官勅賜祭葬謚

李中梧號燦宇滿州人三年任厚重少文不輕顰笑居
官廉明有威不避豪右有以鋤办斃人久未成獄公
命以穀草炙鋤血跡儼然乃脫無辜於獄坐實殺人

者陞薊州道士民攀轅泣送自永至薊凡三百餘里
絡繹不絕歷湖廣按察司

康熙

彭士聖字青琳正白旗人由舉人元年任修孤竹城夷
齊廟灤水泛漲飄集柴木無筭適供其用頗屬神異
但毀祠中古今聯額及延僧建庵恐非兩聖心也

李興元字若始號時滋遵化人滿州籍由貢士五年任
捐俸修府學宮自正殿兩廡戟門泮池橋梁以及櫺
星門明倫堂抱廈修理一新譙樓爲六邑中樞遠近

永平府志

卷之十五

三十

具瞻歲久就圯公多方勸募增修如制又濬久堙古
井葺近郭蚘蚘祠是歲蝗不入境祈雨輒應士民立
石以德之所著有雲鶴軒詩集陞長蘆鹽法道

陳丹字自修號頑龍江南山陽人由舉人七年任文武
兼長凡天文輿圖以及行陣無不精曉先以武科起
家仕淮安總戎從事值我

朝定鼎率衆歸誠

世祖章皇帝賜以宮媛羅氏公詢其家世知爲士妻遂養
爲已女逾年訪其夫歸之長安士大夫爭爲詩歌以

頌其事尋棄武職入太學應辛卯鄉試與子同登賢
書士論榮之初筮河南鄧州牧及守廣西潯州俱循
良稱臬憲三楚好持矜恕以失出左遷永平下車盡
撤地方供應還各屬治事精勤嚴絕餽送日用蔬水
與寒士無異未幾卒於官合郡哀之從祀名宦

蔡興周字姬楨鑲黃旗人由貢士八年任初令完縣治
政有聲行取御史歷叅議左遷永平恤念民艱未入
境卽禁止墳設以清科派之原敬士愛民斥強抑悍
凡事止署限期不輕差役而案牘從無沈擱明敏剔

弊一時積蠹盡消

唐敬一字耕留四川成都人由舉人十年任禁革鋪墊
陋習勸民休息詞訟嚴飭吏胥不輕差役慮滋繁擾
尤雅愛士子於課藝品隲精詳多所啓迪壬子夏旱
十旬不雨禾漸焦公齋戒虔禱三致告文於守土之
神凡五日霖雨大至是年有秋癸丑郡城西北隅被
水冲塌公捐俸補築以固城墉前仕太平司理銜命
招撫安南以軍功擢長安郡丞繼補臨洮所在頌聲
丕作乙卯陞洮岷道副使

常文魁字月生正藍旗人由貢士十五年任治政精勤
歷事敏練折獄不費繁言兩造俱服向者旗丁與投
克肆橫公至咸知守法初謁

文廟見 聖宮頽圯卽鳩工修葺凡祠廡門坊悉心經理
櫺星坊前添設石坊石柵週圍環繚三百餘丈及明
倫堂東西齋房又於學前購隙地創建書院一區爲
生儒會文講讀之所又修武學及魁星樓龍王古祠
移建蜡廟於郭外高敞處并置地以資香火又以公
署半屬頽廢內外修整復於公廡西建立箭廳以上

各工計期末及二載次第告成其費雖有勸助而公
之所捐實過半矣又嘗修補郡乘龔續宋公琬撰後
之缺亦足徵留心文獻之雅意云

梁世勲號鶴汀陝西安塞人由廕生二十九年任品度
威嚴立心寬厚念北平地瘠差繁冰蘖自矢與郡丞
彭公爾年和衷協恭議修 學宮整齊完固復以勸
助餘資繕葺武廟丁丑郡西北城堤被水冲塌經營
修築屬吏有以憂去及物故者虧乏不能賠補公曲
爲區畫周全俾免罣誤及妻孥之累而尤拳拳愛民

糞粥賑饑必親嘗寒熱捕蝗祈雨則不憚先勞然秋
霜凜若毫無寬假以故士樂民安豪強斂跡庚辰陞
兩淮鹽法道尋轉直隸巡道山東藩臬
任廣西巡撫
調安徽巡撫
蔡維寅字典三號賡菴浙江德清人由進士四十年任
公早失怙事母至孝初由中翰筮雲南曲靖郡丞及
遷永平以限促不獲歸省抵任卽板輿迎養服綵跽
迎於堂上合郡觀者莫不觀感歆羨爲政首崇學校
每歲必葺

文武兩廟朔望聚諸生於明倫堂講論經書按季課文分

永平府志

卷之十五

三十二

別獎勵郡舊有義學名存課荒公加意作興慎擇塾
師清查舊存義學田畝并設法新置膳田義學生童
至今懷之今補四川保寧府

華黃號中湄江南無錫人由進士四十三年任高年盛
德介節自持體恤屬僚惠愛百姓至理訟片言平反
人心悅服凡久稽部件到案立剖有同城官以事干
瀆公端坐假寐唯唯以應及審不爲稍假彼復來語
曰因在夢中醒則忘耳其不惡而嚴類如此乙酉歲
值賔興公以永郡科甲寥寥加意振興見魁樓頽壞

捐俸鳩工設法勸助易朽鼎新是歲秋榜合郡獲雋
者八人丙戌兩成進士自此永屬絃誦之風較昔浸
盛以老乞休去士民爲立去思碑公雅好吟咏瀕行
著有別言七律一卷

同知宦蹟

郡丞自古有之歷代名稱各異制曰同知自前朝始
永平設有邊衛而增其銜則曰清軍管馬繼而沿海
多事增其銜則曰兼管海防

國朝易其銜曰貼堂至糧署奉文歸併則曰清軍管糧曰
軍糧督捕遂爲定制焉

明

嘉靖

張守陝西涇陽人由舉人三年任廉慎愛民署灤篆舊

永平府志

卷之十五

三十五

例草束上京輸場歲費不貲民甚病之公爲疏請得
改派附近倉驛歲省銀十之九建昌營中貴鎮守惡
其不利已譖以妄奏械繫京師南北科道交章薦救
陞南京刑部員外灤人入名宦祀之郡亦祀焉

國朝

順治

王覺民字心任江南穎上人由恩貢十七年任持重練
達人稱寬厚長者陞山西太原知府

康熙

韓章字桐庵湖廣漢陽人由恩貢元年任收受糧芻不取額外羨金丁內艱歸行橐蕭然牛車一乘僅供芻秣而已補陞廣西南寧知府

梁泰來字吉人江南壽州人由舉人四年任學識優長治政簡恕經理糧儲收授惟慎奉批詞訟公以執法署本府篆推誠待物廉靜自持留心郡乘禮士修補時以厚重長者稱之惜用未竟以鑄級去

羅京字周師浙江會稽人由貢監九年任歷事勤慎清覈倉糧民間利弊每虛公諮訪有窮民積逋鬻女完

欠公廉其實代償之令贖女以歸境內犖獨時加賑濟代管關篆修舉廢墜愛士恤窮嚴飭輕生澆俗丕變關民戴之以丁外艱去補陞直隸順德知府

朱用礪號冰在浙江山陰人由舉人十八年任剛毅自持處心平恕先以中翰仕臨洮松江郡丞皆有循譽丁內外艱補永平值守守乏攝篆逾年仁慈廉靜益勵厥操秩將滿以朝覲卒於京邸庚寅歲長子凜延來任郡幕士民相見依依猶思舊德焉

彭爾年字永公奉天杏山人由監生三十二年任寬和

宅衷才華敏練清覈糧芻勤飭捕務時與郡守梁公
世勲協恭議修文廟並城垣堤岸勸助經營多公之
力兩奉撫軍檄調赴省值季承審

欽部案件存心矜恤釋無辜牽累者數十人丙子奉天饑
上命截留漕米三十萬石由海運濟公呈請領運前赴復
州舟至大洋颶風幾覆公焚香顛天風頓息咸謂公
忠誠所格克奏厥功生平廉介自持清操丕著而軫
恤窮黎時施惠政無何因公鑄級補任雲南姚州遷
陝西西安郡丞所至士民感戴洋溢頌聲與永郡吻

合云

山海管關通判宦蹟

明

崇禎

楊葆和雲南大理府人由舉人二年任端毅正大不甘趨奉勤政惠民知人愛士時余儀部初就童子試公卽以大受期之勉望諄至以不得於上官謝病歸

國朝

康熙

陳天植字培生浙江永嘉人三年任簡靜不苛治政明

永平府志

卷之十五

三十八

恕修學宮廊廡及山海關志陞山西西安府同知

夏時美滿名安達里字羨之滿州籍廣寧人十年任文

武兼長時蒙古察哈拉部落謀爲不軌羣情洶洶公

完守備禦關民恃以無恐會屠將軍統師進勦公督

運軍需飛芻輓粟供應無悞絕不派擾民間巡撫金

公紀功特薦其他潔已奉公愛民重士監餉公平察

關勤慎修城賑饑聽訟明允善政甚多嘗攝郡篆頌

聲丕振以憂去合郡紳衿父老攀轅截鐙關民爲之

勒石建祠庚寅歲郡守張公朝琮詳入名宦

推官宦蹟

推官者一郡之官評藉以論定訟獄賴以平反仕宦之功名百姓之性命係焉顧不重歟

今制雖奉裁恐虛其歛而致將來之無徵也因附錄之以備考云

明

萬曆

喬學詩山東東阿人由進士五年任嚴明整肅人不能欺屬邑有匿官解銀數千金以虛批應查數年罔覺

永平府志

卷之十五

三十九

公一見發之衛官徵收徭銀耗重貧苦無告公建議令輸納於各衛首領允爲良法行取補刑部主事

沈之唵浙江烏程人由進士十三年任扶持義類綽有擔當丁亥灤水灾縛筏拯溺散粟賑濟生全甚衆督修水圮城垣增修下水關甕城勅南關明灤門一時才猷肆應當事偉之擢南京給事中

天啓

羅成功廣東高要人由舉人六年任歷崇禎三年永城不守公慷慨盡節視死如歸事平立坊表之仍從祀

武廟表忠祠

崇禎

韓國植陝西涇陽人由進士四年任郡當殘破之餘土著稀少人文寥落士氣衰靡公查府治後已廢孤竹書院捐俸修飭延請有文行者董厥事鳩民間子弟肄業其中以東郊外營房隙地九十三畝爲學俸永郡至今食其福利云

國朝

順治

永平府志

卷之十五

四十

尤侗字展成江南長洲人由選貢九年任學識優長治政明決凡文武賢否品隲無私優禮學校訓迪多方每進八庠師儒具滄督課因材鼓舞人文振興一時稱爲盛事以執法不阿調任去所著有北堂秋夢西堂雜組諸書行世

任暄猷字美君息縣籍正白旗人由進士十七年任治政嚴敏不畏強禦聽訟虛心觀理眞僞曲直一見立決民無冤滯康熙六年奉裁轉補

府儒學宦蹟

郡設廣文上爲

朝廷宣教鐸下與諸士立儀型明倫之任風化攸關厥典甚重元明以來咸謂學校乃人材所自出之地簡令翰林充之成弘而後易以明經領以教授佐以訓導掌教生徒各分廩增四十人附學無數法制甚備今簡其有行修學廣足以垂範將來者詳註其蹟庶踵武者有所矜式焉

明

永平府志

卷之十五

四十一

成化

殷衡山東歷城人以訓導任學行優長有鄒魯遺風以三禮誨生徒捐俸置紙筆油燭資之永平甲第彙征多其教益母性嗜魚板輿迎養值灤涸公祝河水漲魚躍後辟爲德莊王審理王政多所裨益卒贈禮部尙書兼武英殿大學士入祀名宦淮南王公世貞爲文鐫石以紀其德云

萬曆

葉崇賢廣寧衛人二十一年以教授任操持有守周恤

貧士故事諸生有歲時束修新生有贄見禮皆力却之時稱其廉

國朝

順治

陳丹字孩赤順天遵化人由貢生元年以教授任值定
鼎初干戈甫定人文寥落公每於試期集州縣有文
望諸生較課鼓舞乙酉開科多有孚其月旦者人皆
服其有汝南之識云陞國學助教歷江西恤刑

符永培奉天蓋平人由貢生六年以訓導任持行恭謹

永平府志

卷之十五

四十二

御士明恕諸生多受其陶鎔之益

王美順天昌平人由貢生十一年以教授任識見超卓
臨事明敏各憲司有緊急公務任使乏員皆委公攝
行事果得濟上下服其安靜而羨其有幹才啓聖宮
頽壞申請修補凡軍民以事詰諸生者公收牒斥逐
之封牒付本生令其自省時進諸生講論經史獎其
所能而進其所不及人以方李宗思常濬孫云

蘇之屏字翠石順天良鄉人由貢生十三年以教授任
事母孝謹每歲請額金修理學宮多方補葺事竣支

銷如數惟求內無愧於己心上無愧於聖賢其廉介
如此陞福建建安知縣

李含春字梅谷順天通州人由進士十七年以教授任
學博識高訓課精勤諸生有執經問義者必虛心講
解終日不倦晉謁者如坐春風中不見有嚴厲色制
有樂舞諸生與祭公詳考明備以崇祀典其恭慎類
如此有選刊程墨名文以教諸生至今行世以憂去
永士至今忻慕之

康熙

永平府志

卷之十五

四十二

謝國擢字心齋直隸延慶人由貢生四年以教授任時
新更策論七年又改正八股兩變文體奉檄月課諸
生嫺習制藝多方鼓舞庚戌歲請告歸里
周弘勳保定左衛人由貢生十七年以訓導任殫心學
務勤於考課以勵士習

經歷官蹟

國朝

康熙

葉映桂字芳巖號東園浙江餘姚人三十八年任誠實
謙和才猷敏練丙戌離任候補知縣瀕行尙構廳署
三楹亦覺度越恒流

戴兆龍字雲從浙江慈谿人四十六年任持躬謙厚奉
職勤謹咸以盛德長者稱之

永平府志

卷之十五

四十四

灤州知州宦蹟

明

洪武

李益謙山東德州人由人材三年任當草昧初城墉官
署學校祠宇多所肇立在任九年

永樂

陶安江南常熟人由舉人十七年任吏事精敏每農時
出郊勸農在任三年境內殷富後致仕去民追思之

宣德

永平府志

卷之十五

四十五

李寧廣東南海人由進士六年任詞嚴貌莊寒暑衣冠
無替精吏事行移皆自屬九年民無怨言

正統

稽昭江南崑山人由進士九年任剛介不阿廉靜自守
博學善楷書蒞民得體既去民不忘焉

景泰

蔡頽福建長泰人由舉人六年任操履勤慎法令嚴明
郡事修舉吏民畏敬境內稱治

成化

楊鼎江西南昌人由進士十五年任博學雄文修鬢宇

鑄祭器作新學校有成都文翁北州伏氏遺意

李智山東曹州人冢宰曷之子由舉人二十一年任廉

明公正吏民畏服以內艱去歷官知府清操一致

弘治

呂鎰字世重山東鄆城人由舉人十年任輕徭薄賦興

學育賢先是灤稅輸邊民多苦之公特建白改運近

地灤人至今德之

汪曉字孟哲江南六安人都御史霖之子由舉人十三

永平府志

卷之十五

四十六

年任平易近民擢福建泉州府同知民爭留之

正德

高堂字升之陝西米脂人由舉人十四年任廉明謹惠

修學造士人頌之不忘

嘉靖

趙葉字子玉浙江東陽人由進士七年以建寧同知左

遷至灤勸農捕蝗興學課士陞部郎去士民思之樹

碑於道

張士儼字敬思四川內江人由舉人二十年任性純雅

政尚慈惠賑饑民葺學宮陞保定府同知

陳士元湖廣應城人由進士二十四年任作公堂建名宦鄉賢祠造祭器修倉賑饑增修灤志以備百年文獻

張璜廣東海豐人由舉人二十八年任修養濟院治橋梁疏灤河濬濠渠環城植柳士民追思崇祀名宦
韓應春山東茌平人由舉人四十一年任朴茂廉明釋誣坐軍四十八人灤民懷之立祠撰碑

萬曆

永平府志

卷之十五

四十七

陸從平陝西華亭人由進士十年任勤慎精敏革積役裁浮羨歲省數千金陞江西臨江府同知

白應乾山東博興人由舉人十一年任親編徭役築環城短墻以資守禦

張元慶浙江山陰人由舉人十四年任有異政夜宿古冶寺女鬼韓氏訴奸僧妙存淫殺狀詰朝捕治伏罪又嘗預識河決囊土塞城門不浸者三板歲饑賑粥全活萬人

劉從仁山西解州人由貢生二十一年任威惠並宣庭

無留訟繕城濬濠修學宮造祭器不踰年百廢俱興
時稱循卓

張堯輔陝西宜川人由舉人二十三年任性耿直愛民
如子以讎誣去公論惜之撰去思碑

何士瑋陝西隴西人由舉人二十九年任誠心愛民積
穀備荒廉明特著陞四川保寧府同知歷任憲副

孫慈湖廣蘄水人由舉人三十四年任墾荒田抑強暴
裁冗費革浮役去後士民思之立祠撰碑

林養棟廣東番禺人由進士三十六年任不畏強禦遭

永平府志

卷之十五

四十八

流謗去後起工部公博雅善詩文精隸楷今偏涼亭
閣存其遺跡

李喬嶽陝西南鄭人由舉人三十八年任真心實政始
終如一陞河間府同知民思頌不忘

周宇四川成都人由進士四十二年任賑饑捕盜續修
州志可稱材吏

林應聚福建漳州人由進士四十七年任清練有爲中
忤調去

崇禎

楊熾貴州銅仁人由舉人元年任庚午

皇清兵克永平州人李際春以城降士民驚竄首領廣文俱逃公拔刃自刎予贈廕專祠

栢之煥奉天蓋州人由舉人四年任兵燹之後修城隍練鄉勇製造火藥神器迄今資用不盡

馮如京字紫乙山西代州人由恩貢十二年任居官清介有惠政常革老人應驛之苦立法攢槽至今賴之
陞任永平海防同知歷官至廣東江南左右布政使

國朝

永平府志

卷之十五

四十九

順治

鄭伸字行臺奉天錦州人二年任推誠待物一介不取
時奉

旨圈田力護近城園舍晉大同僉事歿祀名宦

王光晉字康侯遼東人由貢士五年任蘊藉儒雅華年
丰質曾中東省副車以廷對爲守明析秋毫一切簿
書毫不假手胥吏代灤賠墊逋課千餘金報成擢蘇

州太守

石鯨湖廣武陵人由進士十六年任擅詩文章聖以擅

責投充人奪官瀕行垂橐士紳醵貲以備行李

康熙

陳鍾斗福建古田人由副榜四年任以逃人誣誤免官

州民叩

閻辯復補徐州陞湖廣長沙府同知

李漑之山東長山人由廕生六年任鞠盜得實因投不

忌器竟坐誣去民懷之樹碑記德

宗元字近厚山東淄川人由進士以同知降補十年

任廉靜有爲留心撫字虛公禮士吏畏民懷有古良

永平府志

卷之十五

五十

吏風陞廣西思恩府同知

馬如龍字見五陝西綏德州人由舉人十六年任治政

明爽英發有爲除積弊以恤民艱培斯文以振士習

聽訟虛公案無留牘捐修啓聖宮再建榛鎮署留心

地方廢墜畢舉士民德之歷官江西巡撫

韓逢庥字悅宜山東青城人由貢生三十七年任廉明

正直果敢倜儻愛民如子疾惡如仇灑俗抗糧刁訟

爲藏盜 公徵比不許旗豪劣衿包攬塘比賞完罰

欠衆心悅服踴躍全完詞訟不輕差役下鄉令原告

自拘到案據理立剖刁風頓改又訪拿旗棍窩詐等
事將李德陽正法張燦公斃獄程天寵遠遁通緝雷
厲風行善政累累年餘盜息民安境內大治未幾以
才能調定州牧士民遮道泣送立碑記德

灤州儒學宦蹟

明

天順

方經字世才湖廣黃陂人由舉人三年以訓導任勤學
善誨尤長吟詠至六年乞休士論歸之

弘治

吳祺字貴德江西豐城人由舉人六年以學正任好學
不懈矜式掖儒戊午聘典南畿分考登壬戌進士歷
官都御史

永平府志

卷之十五

五十二

夏廷芝字鍾秀山東章丘人由舉人十六年以學正任
善詩文以親老就教正德丁卯聘典福建分考官至
僉憲竟以父歿不起人稱篤孝

萬曆

熊胤震四川富順人由舉人四十四年以學正任登天
啓壬戌進士有詩文傳世

崇禎

許中澤字雍門順天人由舉人九年以學正任冲融簡
靜式士以和遷秦令去多士懷之

國朝

順治

張國猷順天密雲人由貢生十六年以訓導任爲人爽亮善吟咏能書諸家草楷行隸廟學傾圮捐俸募修殫竭心力始建聖殿及明倫堂堅麗改觀未幾以裁缺改補清河遺兩廡啓聖祠未墜深以爲恨賴繼任學正王公麟圖至續成厥功

康熙

王麟圖直隸保定人四年以學正任繼前任訓導張公

永平府志

卷之十五

五十二

國猷蹟捐俸修理文廟及兩廡啓聖祠魁星樓資用不足至出家人簪珥助之百方勞來諸廢悉舉工竣仍寓書報張不欲居其成也士兩賢之

白學曾字若魯直隸南皮人由舉人二十九年以學正任古道端方復和易坦率士皆敬而愛之竭蹶募修明倫堂及名宦鄉賢兩祠嘗代州徵比不事撲責民感其德爭相輸納生平嗜古博學總憲喻公成龍歸灤詩文唱和結爲忘形契戊子歲秩將滿乞休去士民餞送數十里其盛德在人如此

灤州佐貳宦蹟

明

正統

楊雄字永和山東沂水人十二年以州同任天資聰敏
九歲通書筭十五精史學在任廉靜有爲修城濬濠
懋著政蹟以內艱去州人懷焉

弘治

商良臣浙江淳安人由監生十五年以州判任催徵不
擾修學有勳

永平府志

卷之十五

五十四

嘉靖

陸府江南興化人由官監九年以州同任政聲赫然考
最居上第未幾乞休當道嘉其志多贈以詩去灤人
思之刻像於碑

蘇術廣西陽朔人由進士十六年以州判任英敏篤學
善篆隸嗜古典三仕令尹丁酉擢四川道監察御史
謫判灤恤斃懲暴百廢聿興政暇輒召生徒講論不
倦居三年陞南京兵部主事浙江紹興知府

國朝

順治

史在德浙江山陰人由拔貢十三年以州同任持身醇
謹雅善古文辭永屬公私辭命多出其手以代庖邑
篆註誤去士民惜之

康熙

鄧天棟字華嶽遼陽人由監生二年以州同任歷事詳
慎治政敏練其識力擔荷皆出人右代攝各州縣印
務咸以能稱之

永平府志

卷之十五

五十五

盧龍縣知縣宦蹟

明

成化

劉魁山東高唐州人由進士二年任廉以持已能以御
事公以存心正以率下秩滿擢御史

喬聰河南河內人由舉人十年任寬猛適宜不以嚴刻
厲民不以姑息養奸吏畏民愛陞浙江衢州府通判
人多去後思

李景華江南江都人由舉人二十一年任治尚節愛御

永平府志

卷之十五

五十六

事果斷性不肯奔競時稱爲三代遺直云

萬曆

王袞山東陽穀人由舉人二十年任性坦易才敏決并
櫃以省收頭俵馬市之都門免貼銀賠累之苦倭警
將籍民爲兵遠近駭竄公力陳當道更爲召募應者
立集六屬安堵陞陝西耀州知州

葉世英字春谷廣寧衛籍浙江寧波人由進士二十四
年任明敏倜儻有應變才二十六年奉調征倭廣兵
五千譟變於山海公單騎陳以大義悉撫定之內三

衛編徭例屬附郭縣官審定之訪役詆欺衛弁率意
報徭驟減驟增駭愚啓倖爲時大害公先期諭衆革
除前弊令各戶自平一時承應如流六屬咸取法焉
尤屬意學宮修闢雲遠建魁星閣於埤上樹平臨北
斗坊以應斯文興起之兆郡中自是科第蟬聯遷兵
部主事

王象恒山東新城人由進士二十八年任性廉潔多惠
愛甲辰值灤漆漲溢郭內行舟歲饑流民載道公開
倉賑粥全活甚衆學宮傾圮設法修葺士民咸稱頌

永平府志

卷之十五

五十七

之

趙紱號懷東山西樂平人由進士三十五年任實心爲
政勤儉自勵徵收弗遣役滋擾與民約四仲受輸無
後期者聽訟平允不爲緩罰歲饑賑糜活人無筭編
審僉富家應役以甦貧民人咸悅服擢御史

孫止孝山東歷城人由進士四十五年任勞心撫字持
已潔清且英毅有遠畧時值多事創立射會練習鄉
勇以備緩急尤作興斯文歲時督課設立賞格以示
鼓舞入祀名宦

崇禎

張若麒山東膠州人由進士七年任果達明爽案無積牘革除僉派民役收納之累立櫃書收受至今便之秩滿行取

馬孔健河南陳留人由進士十年任當兵燹餘勸農興學固圉安民已卯畿東告警督師孫公傳庭休兵永平欲入城郡民駭甚公設館城外請督師禁兵無入民賴以安被難男婦千餘人給資歸之病者養之庚辰臺司檄縣運糧十萬石至遼民大困公條議令衛卒營兵協力遞運刻期竣役里中子投充椒戚橫噬小民公實諸法不貸有巨族兄弟訟家產公閉閣引咎數日不視事兩皆慚謝和好如初後爭以重賂酬德抗顏郤之其持正惠民如此擢御史

劉濬源山東曹州人由進士十四年任性介操清馳任無行裝止挾一布被於輿中服不衣帛日用惟供蔬菜一束時出巡行預備餅數枚自給於當道毫無餽遺聽訟執法雖勢力者不能干以私永人以趙清獻頌之因介直不阿調順德府邢臺縣

國朝

順治

梁應元字仁吾遼陽人由生員三年任當鼎革初人情惶惑公慈惠寬仁鞠保備至士民愛戴之學宮自崇禎壬午夏遭風變悉傾圮公捐俸募修凡殿廡祠門皆創造一新尋陞江南池州知府轉天津道

趙汲字學夫號潤宇奉天錦州人由貢士五年任沉靜練達廉明仁厚政皆和易近人前令學宮未竣公慨然自任重修明倫堂櫺星坊及門廊齋舍皆繼成之

永平府志

卷之十五

五十九

時部檄召買芻豆赴三屯備行幸羽書旁午民間供應不及公乃給值舖商以所收米豆僱運不擾民而公事立濟陞江南泰州知州

李士模字可庵山東高密人由進士十四年任才識優長遇事立剖盧邑舊無專志公留心纂輯六卷以備一邑文獻約束胥吏不假辭色蠹弊悉除陞大理寺評事

康熙

閔峻字山紆浙江烏程人由拔貢四年任秉性廉潔悉

心撫字編審持公聽訟明決捐俸勸修學宮躬親料理治廬五載考績稱最陞兵部職方司主事

魏師段字松巖湖廣黃岡人由貢士九年任長才磊落綽有擔當履任初革除一切陋弊編審研核均平值聖駕東巡召見詢以愛民之實奏對稱

旨公勤於吏事諸務親裁聽訟虛公恤窮戢暴修學宮及邑治煥然改觀鄰邑有自殫其僕而誣人者承審官顧其豪勢獄竟成公一訊得情莫不以神明頌之

呂憲武字瑞曇山東掖縣人由難蔭十三年任修學宮

永平府志

卷之十五

六十

除火耗理訟得情人以慈父母稱之陞府同知

衛立鼎字慎之山西陽城人由舉人十九年任清明勤

慎治先教化季考諸生詣明倫堂按名講誨定月課規式于鍵戶自愛者尤加器重時邀獎許者後皆聯翩科甲修補邑乘薄斂省刑境內搭橋秫稽向爲民累公給時價採買以清夙弊遇劇有爲秩滿行取

陸楸字林士浙江平湖人由副榜二十五年任廉明剛正不畏權勢時有旗員假公幹虐擾地方公執法嚴懲民獲安堵春郊勸農親愛如家人以直忤去官於

堂上摘印卽怡然外出吏役慮有未完事件勸入署
檢理公笑曰吾已去官無事可辦命整行李惟來時
竹筩傘屐而已出寓蕭寺卽檢帖臨池若不知去官
者因候代輸時鄉民爭致薪米以供饗殮去之日老
幼焚香泣送達于境外紳士送至沙河驛忽瞿然曰
余有一心事未完幸諸公持余札致新任拜惠多矣
索筆書小柬曰得免小卯深爲恩便蓋邑例里長五
日大卯三日小卯旣承催科之責復奔馳赴卯苦累
難支卽瀕行一札其拳拳民瘼宅衷仁恕類如此

晏賓字鹿菴貴州平遠州人由舉人四十四年任天性
仁厚立品端方尙德緩刑愛民重士於聽訟催科常
存矜恤惟以天理良心四字諄諭而感動之以故俗
鮮刁訟亦無逋課每冬徵收倉糧隨到隨收有升斗
不足者憐其天寒路遠槩免補償歡聲載道己丑水
圯學宮設法修葺編審戶口旌舉節烈皆實心研核
公當精詳嘗攝遷篆兩邑差務冗劇公從容肆應措
理咸宜自奉不改儒素各上憲有第一清官之譽以
憂去士民無計挽留歌謠成集以頌其德

盧龍縣儒學宦蹟

明

天啓

張岱遼東義州衛人由歲貢二年以教諭任持已耿介待士謙和勤於課試鼓舞後進不較贄儀周恤寒士人多感之

崇禎

趙允植遼陽人二年以教諭任品行端方勤於訓士凡其誘誨啓迪必以忠孝行誼爲先值庚午兵燹與妻

永平府志

卷之十五

六十二

欽氏暨女同死祀名宦

國朝

康熙

朱持正順天大興人由歲貢十七年以教諭任勤敏供職訓士無倦贊理修學及督修魁星樓閣俱與有功

遷安縣知縣宦蹟

明

洪武

蕭頤二年任草昧之初諸事未舉公首建學校廟貌巍然諸生絃誦得所人稱其知先務祀名宦

弘治

張濟山西陽曲人由舉人九年任時縣殘於兵燹公宇圯穢民爲賦重流離公子惠困窮勞來安集諸廢畢舉尤加意學校九年擢保定府通判祀名宦

永平府志

卷之十五

六十二

鄧萬斛四川富順人由進士十八年任清慎慈愛酌處糧差以均貧富時鎮守中貴燻灼人莫敢撻公獨力拒之一切征求每爲阻抑陞南京大理寺評事祀名宦

正德

羅玉四川南充人由進士七年任馭吏嚴而待民恕歲旱徒跣禱烈日中乃雨民饑請發通州倉粟以賑全活者甚衆以才調南直武進民攀號留之尋遷御史祀名宦

嘉靖

徐州雲南楊林所人由舉人二十年任廉介自守惠愛

元元興學課士有古循吏風

韋文英陝西涇陽人由舉人二十六年任發奸摘伏愛

民作士亶亶不倦陞本府通判卒於官祀名宦

馬仁山東益都人由舉人四十五年任慈祥安靜民受

其福

隆慶

隋府山東魚臺人由進士二年任嚴明整肅卓有擔當

永平府志

卷之十五

六十四

愛禮善類懲惡不假

趙雲翔山東平陰人由進士三年任性稟剛直心存愷

悌公正廉明動必合禮祀名宦

萬曆

馮露河南襄城人由進士四年自樂亭調任廉明仁恕

實惠及民申請減免永平等衛徭銀民爲立石事見

風俗志祀名宦

白夏江南潁州人由舉人九年任初謁廟卽問縣志無

之聞邑致仕訓導王之衡有草遂屬焉遷安縣志始

此又清丈田畝以清賦役百姓感服陞山西汾州知府

雷聲山東禹城人由舉人二十四年任蒞任不受里遞
導行例金革步快懲市豪清筭經費以足歲支酌議
公解俵馬以省各社遞馬銀併東寨中伙之費遷有
渡灤橋每歲秋賦民草束木架甚夥公令民遇夏拆
收所省不貲初下車卽摘發部民蘭文選殺弟事一
切文移俱出親裁奸胥斂跡編審徭役不避權勢卒
於官士民哀思請入名宦

永平府志

卷之十五

六十五

張廷拱福建同安人由進士四十年任優禮學校均平
徭役奸胥積猾禁革一空秩滿行取士民遮留泣送
如赤子之離父母爲立生祠於南關祀之歷官僉都
御史

天啓

王四維山西河曲人由貢士二年任勤敏寬厚禮士愛
民舊例歲派車馬損三役里胥詐害無窮民間苦累
公剔除積弊僉派均平陞涿州知州民思慕不忘爲
立遺愛生祠於縣門東祀之

崇禎

高承埏字寓公浙江秀水人由進士十三年任清惠明
敏力行修練儲備四事加意養士人文蔚起民疊遇
兵荒多轉徙公至先務賑饑全活數千人招撫流移
省刑緩征聞風復業者千七百戶漕船守凍天津檄
州縣陸運津糧至遼東前屯衛遷邑派運四千石公
力請減半念赴津道遠聽民墊運抵明年應納屯糧
或至山海關買運前屯省費萬計豪強投獻勲戚稱
四姓佃戶久厲民公鋤抑之皆投牒歸其原里社奸
民投兵抗糧公攝治渠魁誠各營路督逋賦無少貸
開墾楊家店等處荒地三千八百餘畝捐俸修城數
十丈不費民錢調繁寶抵縣兩地並有去思

國朝

順治

徐逢時字盛寰廣寧衛人由生員三年任當數十年兵
燹之後公恤殘黎緩征呼重學校凡禮士愛民之事
無所不至四年陞順德知府邑人感之爲立去思碑
戴廷對四川中江人由舉人十五年任廉明剛正治政

永平府志

卷之十五

六十六

敏練恤民瘼除役蠹善政累累

聖駕東幸駐蹕遷境一切供應預備有方既不悞公亦不擾民百姓德之十八年陞湖廣沅州知州

康熙

武紘周陝西膚施人由貢士元年任潔已愛民修學課士未幾以逃人罣誤去士民感懷不置

楊鳴湖廣安陸人由舉人三年任賦性溫厚政治寬弘六年遷地被圈部檄撥補任丘民憚路遠群白於公爲力請戶部始免民甚德之

永平府志

卷之十五

六十七

王永命字九如山西臨汾人由舉人九年任持躬清正治政廉明蒞任初悉革陋規禁除耗羨凡食物器具俱見給時值商民德之學宮傾圮城垣頽壞公捐俸設法相繼修整絕不擾民修輯邑志月課士子又奉文補葺冷口邊牆十三處寒暑無間多方鼓舞均得完固九年冬

聖駕東狩駐蹕遷境供應預備井井有條其肆應之才如此陞行人司行人所著有六言通訓松韻堂餘筆邊工漫記別黃臺山詩從祀名宦

唐九緯浙江山陰人由貢士十三年任禮士愛民不事
紛擾自構山亭於黃臺之麓時集士大夫問民疾苦
尋卒於官邑人感悼之

張一諤字松野浙江山陰人由貢士十六年任治政精
勤寬仁撫字整新巒序修補城垣旌節孝以維風勤
考課以鼓士禁革規弊聽訟明允人戴之若父母有
遊棍誘賣故民之妻馮氏於旗下 其婦矢志不從
控部准贖公憫其節捐資代爲贖回其惠愛及民類
如此

遷安縣儒學宦蹟

明

成化

胡憲江南泰和人以教諭任督訓甚嚴嘗夜過號舍察諸生勤讀者勞之否則有罰故篝燈達旦不輟以學在東郭門外奏展東城包學宮於城內士民頌之祀名宦

嘉靖

李臣河南獲嘉人以教諭任正直剛毅師弟間諄諄訓

永平府志

卷之十五

六十九

迪恩義兼盡卒於任士哀慕之祀名宦

吳宜山東濱州人由歲貢以訓導任天性孝友處衆寬和訓士以道義相期不計脩脯陞撫寧教諭兩庠慕之並祀名宦

姚廷鳳江南句容人以訓迪任儀度清雅才高學博有詩古文傳世

杜偉山東濮州人以訓導任坦夷豁達勤訓迪善吟咏意出塵表無嘆老嗟貧之態人以是賢之

國朝

康熙

馬負圖河間固城人由貢生九年以訓導任行誼端方
學問淵邃善詩文尤勤課士尋卒於任士多哀惜焉
馮堯年真定臨城人由貢生十年以訓導任賦性廉介
待士明恕不較束脩督修學宮甚力且慨捐三十金
以襄之亦苜蓿中之不多見者

永平府志

卷之十五

七十

遷安縣主簿宦蹟

明

洪武

金彥祥浙江崇德人三年故元遣將姜文靖內侵攻圍

永平公饋糧不乏及兵迫縣拒守益力事平擢知本

縣轉工部主事至今稱之入祀府縣兩名宦祠

永平府志

卷之十五

七十一

撫寧縣知縣宦蹟

明

洪武

婁大方浙江奉化人由儒士七年任強幹果毅時值草
昧因舊鼎新多所建置寇至率吏民避兵於洋河之
西兔耳山南遂建縣治經營區畫屹然有法寇不爲
患士民德之祀名宦

永樂

陳坤四川石泉人由監生九年任有善政

永平府志

卷之十五

七十二

成化

胡方江西新喻人由監生三年任六事孔修士民安堵
姜鎬河南修武人由舉人十九年任恢廓縣治修建學
校勤政愛民有去思碑樹儀門外祀名宦

弘治

劉玉山東樂陵人由監生十一年任民懷其德
趙之彥陝西涇陽人由舉人廉明仁恕待士有禮治邑
三年百廢具舉行取監察御史

嘉靖

陳思謙廣東揭陽人由進士十二年任刑清訟簡吏畏
民懷陞戶部主事

葉宗蔭浙江遂昌人廣西儀衛籍由舉人資性明敏興
利除害一境肅然致仕去士民攀送至永平涕泣如
失怙恃

謝應徵山西安邑人由監生三十二年任廉而有爲剛
而不苛

段廷晏山西太原人由監生四十三年任誠樸剛直行
所無事士民愛之去之日行李一肩士民攀送流涕

永平府志

卷之十五

七十二

載道

姜密山東夏津人由舉人四十五年任廉明善斷凡事
務從節省擢戶部主事

隆慶

李一本河南邾縣人由進士二年任賦役公平聽訟明
決擢戶部主事

張彝訓山東寧陽人由進士五年任恩優學校澤洽羣
黎士民感德樹碑於西門甕城

萬曆

雷應時山西芮城人由舉人十一年任耿介端方不事
韋脂修輯縣志課民織紡有實惠及民保留加通判
銜治政九載邊邑晏然有古循吏風

王臺字古栢山東臨清人由舉人四十三年任敷政寧
人籌邊足國捐俸創建雲從書院課士不倦有生祠

碑記

崇禎

余爵字天有河南禹州人由進士四年任長才卧理百
姓安堵釐奸剔弊吏胥畏服歷兵部職方司監軍征

永平府志

卷之十五

七十四

寇殉難贈太僕寺少卿謚忠莊

李果珍字荆岑陝西雒南人由舉人十一年任端方清
正治本經術尤作養學校勸課不倦歷官戶部山西
司郎中

國朝

順治

侯一匡山西人由生員元年任當

鼎革之初刑清政簡深得民心未幾卒於官邑人哀之
張毓中字去偏號泊水山西陽城人由舉人二年任邑

當明末差繁徭重及包賠灘塌地畝錢糧爲民大累
公下車清查逋數槩請捐除流亡復業甫七月擢刑
部主事百姓如失父母歷官陝西鳳翔知府

康熙

王文衡字季平江南江寧人由貢生五年任治政精勤
聽訟爽決修建學官城闈及譙樓魁閣凡祀典祠廟
捐募鳩工親爲綜理秩滿陞陝西鞏昌府同知去之
日士民遮留追送者百有餘里

譚琳湖廣崇陽人由舉人十年任愛土恤斃著有惠政

永平府志

卷之十五

七十五

劉馨字敬庵湖廣沔陽人由廩生十四年任治政淳厚
歷事和平捐資創建武廟設立小學修建書院訓課
生童撫字催科悉存寬恕縣志自萬曆以來缺略未
修公留心諮訪纂續刊刻蒞任四載諸務畢舉民受
安靜之福

趙端字又呂浙江錢塘人由貢生十九年任慈惠明敏
釐剔奸弊民畏而愛之尤留心學校獎勵生童捐資
建奎樓設鄉塾置學田立義塚又於城北設冰窖以
供 部例免山海運駝之累境內晏然不愧民牧

撫寧縣儒學宦蹟

明

嘉靖

吳宜山東濱州人由歲貢二十六年自遷訓陞教諭任言坊行表士子矜式捐俸置買學田三十畝以賑貧生有碑記祀名宦

隆慶

曹應誥山東鄆城人由貢生以教諭任性嚴行修動必以禮工詩文勤訓課士論歸之

永平府志

卷之十五

七十六

崇禎

宋坤遼東人由歲貢二年以訓導任時值兵警賴公調戢兵民地方保全

杜浚字騰江保定定興人由歲貢十年以教諭任行誼端方學問淵博誨人傲胡文定教條起衰式靡一時士風丕變庠弟子至今宗仰之

國朝

康熙

劉三德順天順義人由歲貢四年以訓導任盡心學校

躬督大工夙夜匪懈陞趙州學正

辛進修保定新安人由拔監十七年以教諭任律身以正飭士惟謹見明倫堂傾圮捐資首倡重修一新

胡文蔚字豹貞順天通州人由歲貢二十一年以教諭任才華敏達培植斯文值歲試時有庠生爲兵所辱弁威逞虐公侃侃主持士氣賴振八庠至今頌之陞江西安義縣知縣

宋琰字德培順天大興人由歲貢四十六年以教諭任端方自飭廉靜有守署理邑篆有海洋社烈女郭三

永平府志

卷之十五

七十七

姐拒奸慘斃竟犯遁跡公摘發如神按律伏辜萬民稱快尋以憂去士民泣送依依至今感頌不置

昌黎縣知縣宦蹟

明

永樂

楊禧順天大興人十年任課農桑興學校招復逋逃威制屯卒民感其德祀名宦

張約江南山陽人十二年任勤於政治六事修舉

田蕃山東樂陵人十六年任廉能公正治蹟著聞

正統

于顯祖山東蓬萊人平易近民不尚鞭朴百姓懷之

永平府志

卷之十五

七十八

弘治

殷玘山東壽張人八年任清慎有爲捐資修葺學宮城

垣士民均感其德

張雲鳳山東濟寧人由舉人恩威兼著民懷不忘

陳綱浙江金華人由進士十七年任公廉有爲吏民畏

服陞大理寺評事

嘉靖

文世英廣西護衛人由舉人二十二年任多惠政民皆

感戴陞保安知州祀名宦

李希洛山西太原人由進士三十三年任文章政事濯
濯炳著陞給事中祀名宦

胡溪山東清平人由監生三十六年任約已便民志向
不汙民咸思之

楚孔生山東曹州人由舉人四十一年任清操雅量惠
政多端蒞任五年士民感戴以縣無志屬教諭楊公
志高草之灤州學正梁公桂臣修飾焉

陳良輔山東莒州人由舉人四十五年任巨寇薄城公
與民死守城池獲全後被誣謫官昌民立祠祀之

永平府志

卷之十五

七十九

隆慶

張存智山東歷城人由舉人二年任邑當殘破之後修
築安集盡瘁國事士民至今思之歷陞戶部郎中

孟秋山東茌平人由進士五年任達天之學濟世之才
治教兼隆事功懋著官至少卿卒不能殮士民肖像
立祠祀之人名宦

萬曆

吳應選陝西會寧人由舉人五年任清慎居官真誠待
物政通法理允孚民心陞京府通判歷知府有專祠

石之峰山東丘縣人由貢士十六年任修城葺學士民
允賴

馮恩山西代州人由舉人二十年任廉以持躬勤以任
事營建鼓樓修築月城通北門置北關增棧房濬棠
泉士民思之祀名宦

吳望岱前令應選子由舉人三十五年任吏治精明斷
獄敏辨父子繼任昌黎人以比傅僧祐畢元寶云累
官南戶部郎中

楊于陞四川劍州人由舉人四十四年任撫民訓士補

永平府志

卷之十五

八十

缺興廢文學吏治兩擅其美重修邑志筆削簡當彷彿
龍門扶風遺意陞廣西鬱林知州遷雲南武定府
同知死節

崇禎

左應選山西榆次人由舉人二年任甫任三日卽城守
戒嚴庚午正月

皇清兵下永平灤遷俱陷大兵攻圍昌黎八晝夜公誓死
勵衆百計守禦遣人突圍密約樂亭死守以通京師
山海之路賴以全城又滅白蓮教數千人於雲峰寺

以功加按察司僉事

秦士英山西夏縣人由貢士仁恕廉明卹民愛士以疾去士民思之

國朝

順治

劉應錫遼東人由生員三年任當

定鼎之初人心惶怯公廉明慈恕加意撫綏人心始定陞大名府知府去之日民送如市

康熙

永平府志

卷之十五

八十一

寇新民字振之河南西華人由拔貢七年任仁恕不苛敬士恤民持重而多惠政尋以註誤去百姓懷之

王曰翼字健齋山西陽城人由舉人九年任清慎有爲殫心撫字舊有糧羨陋規公張示永除以甦民困學

宮頽圯公捐俸修葺及魁星樓名宦鄉賢兩祠又繕城修志課士抑強編審公平士民愛戴爲立去思碑

陳邦齊字君弼奉天盖州人由廕生十五年任操持廉介治政仁明向者昌邑錢糧積逋百姓流亡公蒞任一切繁擾陋弊不便於民者盡行禁革省刑薄稅百

姓接踵復業聽訟虛公案無沉牘城隍廟灾捐募重
新百姓以慈父母稱之

昌黎縣儒學宦蹟

明

景泰

閻禹錫河南洛陽人由舉人以訓導任學行俱優教人有法陞國子監監丞尋遷北畿督學御史

嘉靖

楊志河南湯陰人由歲貢十四年以教諭任掌教九年與人無競士多感念

張錦山東兗州府人二十八年以教諭任持躬端厚喜

永平府志

卷之十五

八十二

怒不形於色士子感戴

國朝

康熙

李維楫眞定定州人由歲貢六年以訓導任持躬耿介課士精勤多士欽其模範

昌黎縣縣丞宦蹟

明

永樂

李泰河南鹿邑人進士謫任惠政及民咸感戴之尋復
行取

萬曆

張示江南泰州人由歲貢十一年任一清如水空囊以
歸時咸頌其廉介

永平府志

卷之十五

八十四

樂亭縣知縣宦蹟

明

洪武

王文貴由人材舉卓異科三年任當草昧初公勵精爲政六事修舉凡學宮壇壝祠宇公署爲之煥然歷官大理寺少卿

成化

李瀚山西沁水人由進士十八年任邑故土城巡撫閩公檄縣甃以磚更十餘年因功自闡人汪直啓讐數

永平府志

卷之十五

八十五

有邊警人益恐公下車卽修築竣工至今攸賴儒學舊在文廟後湫隘特甚公乃遷於廟左拓前後地數畝宏敞遂與廟稱又鑄祭器育賢才文教蔚然其他惠政種種不能具悉大都潔已愛民寬而有則嚴而不苛故公去逾百年而士民思慕弗替隆慶初重修城東北隅十餘丈堅鞏異常民不忍撤而止瞻者若召棠焉擢監察御史歷官南京戶部尙書贈太子少保

弘治

郝本山西陽曲人由進士七年任賦

爽蒞政廉明

陞涿州知州歷官陝西僉事

田登山東武城人由進士十年任興學育材政教兼舉

改監察御史

原軒山西陽城人由進士十四年任剛方正直不畏權

要篤志愛民屢著異績有古循良風吏民懷焉歷官

都御史

正德

趙寬山西垣曲人由舉人四年任性資方正有執持文

永平府志

卷之十五

八十六

學飭治行誼表俗不事苛察而吏民畏戴有嚴父保

母之頌時嬖倖擅權有鷹房闖人繹騷公召而詰之

闖倨侮無狀公怒笞焉坐是被逮下獄法官察其庇

民無他乃擬贖還職大冢宰亟賢之亡何竟掛冠而

去迄今人稱賢令

嘉靖

楊鳳陽江南宿州人由貢生二十二年任先是邑八年

逋負未完公至嘆曰非獨小民罪也咎在催者索收

者侵督者徒鞭箠之奈何不逋乃盡革諸弊酌緩急

從便宜力絕奇羨於是百姓樂輸流者歸業邑無逋
負自茲始廟學繕於成化間圯甚盡撤而重建之時
有羣盜獄具解府府胥泥案累及無辜郡逮拷訊欲
置重罪爲白其寃獲釋寧忤郡公意不惜也他政類
此大都恤犛弱抑豪右懲刁惡清操不染業將遷秩
竟爲人所陷題壁而去士民追隨嘆息有泣下者
呂鴻山西陽曲人由舉人三十二年任賦性寬厚蒞政
慈祥優士待民有如保母改教授陞府同知

隆慶

永平府志

卷之十五

八十七

李邦佐河南陳留人由進士元年任時值多事公修繕
城池高厚視昔加三之一增四門月城各置鐵棧樓
櫓敵臺雉堞倍盛於前簡募丁壯製造火器民恃無
恐性彊直無阿徇剖斷如流除奸若刈一方戴之爲
神君云擢禮科給事中去後樂人立祠合前令李瀚
共祀之

萬曆

潘敦復字彥恒山東夏津人由進士十八年任爲政不
事催科首崇撫字簡練鄉兵以備城守修葺學宮建

設倉廩邑無專志公纂輯二百餘年故實遂成一代
文獻歷陞山西大同知府

崇禎

李鳳翥字瑞徵江西樂安人由舉人元年任才裕性果
加惠犒氓值

皇清兵下永平公鼓舞士民多方悍禦援兵抵邑應付有
方因忤當道排擠之士民爭先保舉不得立石頌之
祀名宦

國朝

永平府志

卷之十五

八十八

順治

韓望字儼然陝西涇陽人由進士九年任吏治敏達剔
蠹祛奸一時萑苻不驚強暴斂跡擢戶部福建司主
事士民遮留自辰抵暮不忍舍去

康熙

于成龍字振甲鑲紅旗人由廕生七年任宏才偉畧清
正有爲念恤民艱首嚴苛派歲饑請賑實惠均沾繕
城垣除積弊未兩年政通事舉以署灤篆註誤士民
叩 闔保留於十年復任由是修學宮勸開墾革里

催詳除美化屯額糧以恤丁絕請退任丘撥補地畝
以免民賠累禮賢愛士緝盜安民十八年陞北通州
知州遷江寧知府擢江南按察司使陞副總河直隸
巡撫疊荷

聖眷加太子少保晉陞都察院左都御史本旗都統河道
總督功業赫赫社稷倚重祀名宦

金星瑞浙江仁和人由監生二十一年任慈愛羣黎隆
禮學校修文廟崇祭典備樂器召募樂舞生六十四
人槩予優免水冲城垣頽圯過半設法修築絕不派

永平府志

卷之十五

八十九

累民間接物和平而執法必嚴強暴自此斂跡陞雲
南師宗州知州

湯燧字篆辛浙江仁和人由監生三十八年任臨民以
寬待士以禮以才能擢永定河同知

王經陝西朝邑人由副榜四十三年任廉以持已勤于
視事以疾卒于官邑人至今懷之

樂亭縣儒學宦蹟

明

正德

邵鑑河南洛陽人由歲貢二年以訓導任平易篤實勤督課業訓迪有方士風變焉祀名宦

賈奎山西蔚州人由監生十年以訓導任性行剛方持守廉潔造士勤敏綽有矩度嘗條陳八事欲獻爲上官所止志大有爲竟賚以歿士類悼之祀名宦

嘉靖

永平府志

卷之十五

九十

王斐河南襄城人由歲貢三十六年以教諭任志行高明諸生貧者餽多不受修祭器植松栢不自暇逸君子稱之

崔佩山西沁州人由歲貢三十七年以訓導任立志端方待士寬厚諸生餽贄槩置弗較以廉靜著聞

隆慶

劉邦彥湖廣龍陽人由舉人二年以教諭任學問宏邃志行端方卽威儀詞章亦卓有矩矱以行誼作人以經術迪士諄諄戒浮薄釐陋習一事不苟學者翕然

嚮風陞高邑知縣歷大理寺寺正

萬曆

楊芳山東益都人由歲貢七年以教諭任公年已耆衆
謂爲溫飽爾往例新生進贄先定甲乙衆以請公笑
曰此豈市廛吾爲賈人耶諸生覘其不較具儀甚涼
公略無芥蒂意其高邁類此居常溫恭待生徒曲盡
恩禮人樂親就有過必正色戒諭亦不阿徇時以清
正頌之

永平府志

卷之十五

九十一

樂亭縣縣丞宦蹟

明

嘉靖

仕逮江南蕭縣人由監生二十六年任家居孝親親終
廬於墓側及佐邑政專慈惠而性尤介直士人謂其
孝慈無愧聖訓云

永平府志

卷之十五

九十二

山海衛儒學宦蹟

明

嘉靖

李英江西饒州人由歲貢以教授任潛心聖賢之學每
事務躬行實踐期可盟幽獨尤以師道自任教人不
專事舉子業對諸生燕坐談理道辨義利諄諄不倦
徒輩有能厚人倫尚義舉者獎進不實口後聞兄計
哀毀踰禮見者感泣因觸時政竟棄官歸乃賦詩云
來時行李書一束去時行李一束書孤竹二君今始

永平府志

卷之十五

九十二

別清風百世竟何如當時與胡敬齋先生齊名西江
至今推理學必曰胡李云

張倫山西沁水人由歲貢十五年以訓導任提躬嚴整
博學善誨立訓以聖賢心身正大爲詞不瑣章句每
歲博士俸及祭肉悉捐賜貧士朔望振鐸諸生森森
就業毋敢惰者以故桃李成蹊如劉太僕卿復禮暨
府縣正佐出仕者不下十餘輩皆其衣鉢焉

國朝

康熙

韓國龍順天密雲人由歲貢元年以教授任修理學宮
殫竭心力

錢裕國字園府順天人由舉人七年以教授任敦厚持
躬忠誠垂範虛公訓課諸生多受其教益時郡丞壽
州梁公泰來留心郡乘屬公修補以備一郡文獻

武功宦蹟

元

皇慶

懷閭公爲瑞州達魯花赤時海濱縣宣聖廟燬於兵燹前政數十輩咸置弗理公至邑人請之遂慨然興復不十旬成其崇儒慕義類如此

明

洪武

徐達江南鳳陽人帝以燕民新附又地隣邊塞於十四

永平府志

卷之十五

九十五

年命公鎮之乃依山阻海創立關城復修築墻垣阻塞隘口聯絡周密規度宏遠累官太傅中書右丞相晉爵魏國公卒追贈中山王謚武寧景泰間山海士民感念功德不忘請建專祠春秋祭享

隆慶

戚繼光山東登州衛人以勦平倭寇功言官交請召入京營練兵尋加少保兼總理鎮守薊永山海等處巡歷各邊相度平險建築敵臺千里森列軍民不病皆公調度得宜所致也又嘗增餉廩製車戰及火器兵

械立傳烽制掣旗舉礮頃刻千里百廢具舉奔走諸
將檄飛隨羽至大閱三十萬衆咸遵紀律閱視大臣
每以李郭稱之著有止止堂集紀効新書練兵實錄
眞詩書名將至今三屯營立祠祀之

萬曆

王守道遼東左屯衛都指揮使於十一年任山海路叅
將十二年九月敵侵寧前公率本路并延綏兵東援
遇敵却之十月敵復合兵夜半直逼關門公同延綏
將杭大才中軍盛莊列營城東血戰竟日敵失利退

永平府志

卷之十五

九十六

去實有全城之功

朱洪範京衛指揮由武進士於三十年任山海路叅將
才品優長儀表出衆整飭營伍任用賢能時值稅監
擅權公曲護地方得免荼毒且長於吟咏有樽俎折
衝之槩當年推爲儒將

杜松陝西榆林衛人四十六年總鎮山海秉性忠義氣
辟萬人率兵援遼渾河大戰死於陣謚忠壯

劉渠號雙泉順天人四十七年總鎮山海體貌魁岸武
藝優長而性情儒雅愛士禮賢嚴禁宮價不致擾民

有古良將風遷鎮廣寧臨陣竟以身殉壯哉

天啓

孫承宗號凱陽直隸高陽人由進士廷試第二公沉毅
豁達壬戌以內閣督師關內設三鎮置營房於城內
外軍民異處各安其所捐俸修學廣科舉額以興人
文施穀濟貧惠及百姓三載勞瘁告病回籍崇禎巳
巳特旨起公匹馬就關躬督士民防守關城賴以保
全當多事之際執掌軍務安詳鎮定不動聲色有綸
巾羽扇之風焉

永平府志

卷之十五

九十七

崇禎

唐之靖浙江山陰人由會舉第二人元年任武學科正
三年庚午

大清兵下永平公先令闔家俱焚因謂左右曰吾死之後
亦焚吾屍遂西向再拜自縊從容就義大節昭然祀
武廟忠烈祠

程應琦浙江山陰人由三科武舉元年任永平道標中
軍都司沉毅英發有應變才庚午永城不守公挺戈
巷戰事不濟拔所佩刀自刎不死令家丁斷頭衆皆

涕泣勸慰公鬢髮裂眦復起自殺事平立坊表之祀
武廟忠烈祠

房應祥號泰寰盧龍世胄歷營路叅軍時永平多事城
守单弱兵備張公春會撫按彙題命公爲城守中軍
專司團練鄉勇庚午揚武營兵守 縱火陷城公分
守東面率所部堵陴血戰冒矢石死事定贈鱗勇將
軍立坊表之仍祀武廟忠烈祠子三長星華貢士歷
福建漳州知府次星燿不慕仕進多俠氣人雅重之
季星煥歷山東武德道副使有政聲卒於官人以爲
永平府志 卷之十五 九十八
公忠烈之報云

朱梅號海峰遼東前屯衛人三年總鎮山海厚重渾樸
御事精詳先是值廣寧失守邊人要賞士民震駭當
事難之時公爲裨將慨然自任出撫於關東八里舖
讐以威靈綏以恩信衆皆帖服羅拜而去關門安堵
至招降丁活難民墾地築垣種種著績適遼兵潰還
至關公匹馬獨前宣布恩威相對撫膺流涕無不感
動鎮關不浹旬克奏膚功加秩世襲及卒晉階諭祭
以酬其勲子國梓歷官永平道載宦蹟

楊嗣昌字文弱湖廣武陵人由進士秉憲山石將佐凜如神君六年晉山永巡撫豁達沉毅聰穎絕倫每條對行間要害頃刻千言皆中欵綮凡閱武將士才勇經目不忘賞罰嚴明建山海南北兩翼城以固疆域又以學宮魁路狹窄卜乾地建明倫堂三楹規模壯麗自是關門科第較前頗盛所著有中樞奏議及鄉約化民書數萬言撫山永時令有司朔望講解以正風俗焉

馬成名江南溧陽人由進士十五年以密雲道擢陞山

永巡撫厚重端凝才優識練設備邊防簡練士馬人心愜服巖關中外倚爲屏翰未幾以事就逮時論惜之

協鎮山永副總兵宦蹟

永平自庚午不守設城守中左右三營以副將一員
遊擊二員統領之繼因多事間或防守各邊及徵調
應援去留不常

今制止設副將一員領左右城守二營兼轄山石燕建四
路及邊防各營汛焉其間智勇才略暨政績可觀者
亦不乏人後之修武備者得無有覽於斯乎

國朝

順治

永平府志

卷之十五

一百

張思誠號至隆遼陽人十三年任永平爲兩京要衝行
旅絡繹盜有冒幹辦使臣公行刦掠者地方苦之公
履任初遇有刦盜恐遊兵莫敵每親率健丁窮追務
獲盜漸斂跡又嚴禁剋扣兵餉軍士得沾實惠一時
軍容嚴肅器械鮮明弁丁有生事者必執法懲之故
終其任兵民相安調陞浙江溫台等處副總兵
李廷楠字若梓陝西西安人由功蔭十六年任先於五
年自一片石備禦陞山東沂州鎮遊擊征勦各寨叛
寇所向克敵陞山西大同鎮叅將時東粵負固調公

隨征公首克凌江進兵要路直抵信安卽授廣東肇慶府副將時封川開建諸處未靖公奉將軍令代宣恩信不旬日傳檄悉定論功加左都督推陞茲任向者邊道銜代監軍前協每以小節各不相下致構嫌隙公履任初惟以封疆爲重會道易輿以騎一遵儀注自此文武相睦待寮屬氣度溫和時勤操閱以練技勇嚴禁借支以清尅扣雖幼歷疆場未工文墨然尊賢禮士饒有儒將風流調陞江北壽春營副總兵

康熙

永平府志

卷之十五

百一

張應標號正吾陝西崇信人由將材七年任先自三年奉檄勦四川陳家坡巨寇劉二虎一戰奪賊老木吼窩巢二虎失勢雉經餘黨悉平又楚有大逆李來亨者久據茅麓山寨聲勢汹涌爲湖湘大害公與總統梁家琦會勦掘壕築堤割汛分守來亨突衝公汛夜遁公奮力截殺賊衆大敗叙勦蕩功加都督僉事推陞茲任公膽略過人智勇素著歷事精詳持躬敬慎所屬自都闔下及部伍之微俱推誠以待和而有體有古良將風

喻三元字魁一江南徐州人十二年任持已潔清治行
果決初從征閩省敘功陞遊擊鎮守北樓隘口其地
相隣五臺向爲盜藪公防禦有方恩威並用萑苻斂
跡山野肅清加都督同知陞授茲任簡練士卒法令
嚴明念芻餉爲三軍命脈嚴杜剋扣間有盜警公聞
報單騎叱馭務期必獲鼠輩聞風消弭地方賴以安
寧

協標守備宦蹟

國朝

康熙

李一奇字秀實通州人由將材十年任才勇超卓長於
騎射清覈士馬愛恤部伍賞罰嚴明與民相安

永平府志

卷之十五

百三

永平衛守備宦蹟

明

成化

羅綱永平衛指揮代任剛毅有爲兼通文事有聲於時

嘉靖

祝福山海衛指揮代任清操如玉紳士多敬重焉

崇禎

陳靖華字養素東勝衛指揮元年代任明決有爲安靜

不擾百姓愛戴之

永平府志

卷之十五

百四

國朝

順治

高君錫字康侯大興人由武進士十年任舊制永盧東

興四衛時歸併於一事緒紛紜公區畫有方四衛愜

服編審公平不事苛求百姓至今懷之

山海衛守備宦蹟

明

正統

王整羽林前衛人八年任沉毅有謀長於幹濟山海設
守官自此始前此治尙草創規制未備公至次第興
舉凡學廟樓櫓及廨舍之屬多所增建撫士馭下寬
而有體軍民畏而愛之

天順

劉剛山海衛指揮僉事視衛篆以賢能稱創建 文廟

永平府志

卷之十五

百五

東西廡暨學舍諸生違教者罰之罔敢不服其公正
類此

谷登永平衛指揮代任驍勇善射作爲傑出一時倚重
之

弘治

申寧沂州衛人安靜不擾地方德之陞山東都司以廉
勤勒石於石門路之彰善碑

國朝

順治

郭之俊宣鎮人由武進士六年任慷慨有爲清正不苟
愛民如子辦事克勤時撫寧衛初併山海公視之如
一下民戴之陞任民遮送不忍舍去

王御春陝西人由武進士十七年任誠慤爲政徵緝有
方陞山西陽河堡都司

康熙

陳廷謨京衛人由武進士六年任歷事詳慎御下冲和
明恕不繁百姓愛戴修山海關誌及勸募重修望海
樓其政績略可觀矣

永平府志

卷之十五

百六

永平府志卷之十五終